

東京大学東洋文化研究所
第 11 册
No. 4008

0 1 2 3 4 5 6 7 8 9 5

不 許 複 製
NOT TO BE REPRODUCED
東京大学東洋文化研究所

杜氏通典卷第一百二十六

禮八十六 嘉五 纂類二十一
大唐開元禮二十一

皇太子加元服告太廟 臨軒命賓贊

冠 會賓贊 朝謁 皇太子謁太廟

會群臣 群臣上禮 皇太子會宮臣

宮臣上禮

皇太子加元服告太廟

皇太子將冠告太廟如常告之儀

臨軒命賓贊

所司先奏請司徒一人為賓卿一人為贊冠吏部承
以戒之前一日尚舍奉御整飭御幄於太極殿衛尉設



群臣朝集使諸蕃客次於左右朝堂太樂令展宮懸之樂於殿庭設舉麾位於殿上一位於懸下鼓吹令設十二案乘黃令陳車輅尚輦奉御陳輿輦典儀設文官一品以下五品以上位於橫街之北西面北上諸州使人五品以上合班六品以下位於橫街南諸州使人六品以下諸蕃客又在南皆西面北上設武官五品以上位於橫街北東面北上諸州使人五品以上合班諸親位於其南六品以下於橫街南諸州使人六品以下及蕃客等文於其南皆東面北上設典儀位於懸之東北贊者二人在南少退俱西向設東受命位於橫街南道東北面贊者位又於其後少東

北面奉禮郎設門外文官一品以下位於順天門外道東每等異位重行西面武官三品以下位於門西每等異位重行東面並以北爲上其日諸衛勅所部列黃麾仗如常儀群臣各依時刻集朝堂俱就次各服其服侍中量時版奏請中嚴協律郎太樂令帥工人就位諸侍衛之官各服其器服奉迎典儀帥贊者先入就位通事舍人引光祿寺官入立定又引賓贊入立於太極門外道東西向黃門侍郎引主節持節中書侍郎引制書案立於樂懸東南面西北上侍中版奏外辨皇帝服通天冠絳紗袍以出曲直華蓋警蹕侍衛如常儀皇帝將出仗動太樂令令撞黃鍾之鍾

右五鍾皆應協律郎舉麾鼓祝奏太和之樂皇帝升
輿出自西房即御座南向坐符寶即奉寶置於御座
樂止通事舍人引賓贊入就位賓贊初行入門舒和
之樂作至位樂止立定典儀曰再拜侍中及舍人前
承制侍中降至賓前稱有制公再拜將加冠於某之
首公其將事公少進北面再拜稽首辭曰臣不敏恐
不能供事敢辭侍中升奏又承制降稱制旨某公將
事無辭公再拜退復位侍中退舍人至卿前稱勅旨
卿再拜將加冠於某之首卿宜贊冠卿再拜舍人退
黃門侍中引主節至賓所主節授黃門侍郎黃門侍
郎執節立於賓東北面賓再拜授節付主節訖又再

拜主節立於賓後黃門侍郎退中書侍郎引制書案
至賓所取制書在賓東北面西立賓再拜受制書執
立又再拜持案者立於賓後中書侍郎退典儀曰再
拜贊者承傳群官在位者皆再拜舍人引賓贊出賓
贊初行樂作出門樂止侍中前跪奏稱侍中臣某言
禮畢俛伏興還侍位皇帝興太樂令令撞鞀賓之鍾
左五鍾皆應鼓祝奏太和之樂皇帝降座侍衛警蹕
如來儀入自東房樂止舍人引一品以下以次出初
賓贊出門賓以制書置於案升車從輅而行威儀鼓
吹詣東宮降輅入次賓贊具服其一品以下以次出
蕃客各還館九品以上詣東宮朝堂次服其服就位

如冠儀

冠

前一日衛尉設賓次於重明門外道西南向贊冠次
又於其西南向並鋪床席又於重明門內道西施一
次擬會賓替殺文武群官九品以上及群親并官臣
次如常儀奉禮設文武群官九品以上諸親在五品
之下及官臣門外位如常儀設殿庭位文武群官共
典儀共官臣合班諸親在五品下文官在東西面武
官在西東面皆以北爲上又設皇太子位於閣外道
東西向設三師位於閣外道西三少位於三師之南
少退東向典儀又設皇太子受制位於樂懸北北面

所司設軒懸之樂於殿庭又設舉麾位於庭上一位
於懸下有司設皇太子羽儀車與於殿庭如常儀典
設郎帥其屬鋪解劔席於懸之東北冠日平明官臣
皆朝服非官臣者公服三師三少公服並集於重明
門外次宗正卿乘犢車侍從詣左春坊權停左右二
率各勒所部屯門列仗左庶子版奏請中嚴土人及
諸行事之官各入就位奉禮郎設壘洗於東階東南
壘在洗東篚在洗西南肆篚實中加勺典禮郎鋪皇太子
冠席於殿上東壁下近南南向設賓席於西階上東
向設主人席於皇太子席西南南向設三師席於冠
席北三少席於冠席南典設郎張帷幄於東序內設

禱席於帷中又張於序外擬置饌物等內直郎陳服
於帷內東面北上袞冕服玄衣纁裳九章白紗中單
黼領襟襜裙革金鈎釵大帶朱黻二章玉貝劍火珠
鏢首瑜玉雙珮珠組雙大綬四綵赤白縹紺純朱質
長一丈八尺三百二十首廣九寸小綬長二尺六寸
色同首綬而首綬
之問施白襪赤舄金飾象笏遠遊冠服絳紗袍白紗
中單皂領襜褕裙白方心曲領假帶絳紗蔽膝白練
裙襦白襪黑舄其革帶劍珮綬笏輿冕服同緇布冠
玄衣素鞞白紗中單青領襜褕裙履鞮革帶大帶笏
緇纒用皂羅巾方六寸
屬帶於前兩隅犀簪二物同箱在服南櫛實
於箱又在南莞筵四紛純纒席四績純又在南良醞

令實側罇無醴加勺幕於序外帷內設罍在洗西籩
在洗南東肆實巾一角解角杓各一加幕太官令實
饌豆九邊九於罇西俎在豆北執在庭壘洗者絳公
服立於壘洗之內北向執帷內罇壘洗邊豆俎等並
絳公服立於罇壘邊豆之所冕白珠九旒犀導組纓
青纁充耳遠遊三梁冠金附蟬九首施朱翠黑介幘
犀道肆髮纓緇緇布冠青纓屬於冠冠冕各一箱盛
奉禮郎二人各執立於階之西東面北上主人各贊
冠者黼子升諸東序帷內少北戶東西面立典謁引
群官以次入就常位初賓贊入次左庶子版奏外辨
通事舍人引三師等入就閣外道西位東面立皇太

子著空頂黑介幘雙童髻呈道賓飾綵衣紫綉成領綠
錦紳烏皮履乘輿以出洗馬迎於閣門外左庶子跪奏稱
 左庶子臣某言請殿下降輿俛伏興還侍位皇太子
 降輿洗馬引之道東位西向立左庶子又前跪奏稱
 左庶子臣某言請殿下再拜皇太子再拜三師三少
 荅再拜洗馬引就階東南位三師訓導在前三少訓
 從於後千牛仗二人夾左右其餘仗衛列於師保之
 外通事舍人引宗正卿入見皇太子訖通事舍人引
 出迎賓洗馬引皇太子初行樂作至階東西面立偃
 麾樂止凡樂伶官帥舉麾工鼓祝而後作偃麾戛敵而後止宗正卿引迎賓於
 門東西面賓立於門西東面宗正卿再拜賓不荅拜

賓入門樂作主人從入立於樂懸東北西面賓入贊
 冠者從入舍人引賓贊詣殿階間南立樂止贊冠者
 立於賓西南東面節在賓東少南西面制案在贊冠
 西南東面賓就案取制執洗馬引皇太子詣受制位
 北面立皇太子初行樂作至位樂止主節脫節衣賓
 稱有制皇太子再拜宣詔曰制皇太子某吉日元服
 率由舊章命大尉就宮展禮訖皇太子又再拜少傅
 進詣賓前受制書退授皇太子皇太子受制書付庶
 子按退洗馬引皇太子師保等如式升東階量人初
 行樂作至階樂止入東序帷內近北西向立師保等
 就席位訖賓升西階宗正卿升東階各立席後初賓

升舍人引贊冠者詣壘洗盥手升自東階詣序帷內於主人贊冠之南俱西面贊引皇太子出立於席東西面賓之贊冠者取纒櫛二箱坐奠於皇太子南端興席北少東西向立賓揖皇太子進升筵西向坐賓之贊冠者進筵前東面坐脫空頂黑介幘置於箱櫛畢設纒興少北南面立賓降盥主人從降樂作賓升樂止主人從升執緇布冠者升賓降一等受之右執頂左執前進太子筵前東面向立祝曰令月吉日始加元服棄厥幼志慎其成德壽考維祺以介景福乃跪冠興復位東面立賓之贊冠者進筵前東面跪結纓興復位皇太子興賓揖皇太子贊冠者引皇太子適東

序帷內着玄衣素裳之服以出立於席東西面賓揖皇太子進升筵西向坐賓之贊冠者進筵前東面跪脫緇布冠置於黑介幘之箱櫛纒依舊不解興復位賓降二等受遠遊冠右執頂左執前進皇太子筵前東面向祝曰吉月令辰乃仰嘉服克敬威儀式昭厥德眉壽萬年永受祺福乃跪冠興復位賓之贊冠者引皇太子適東序帷內著朝服以出立於席東西面賓揖皇太子進升筵西向坐賓之贊冠者進筵前東面向跪脫遠遊冠置於纒箱櫛纒依舊不解興復位賓降三等受冕右執頂左執前進皇太子筵前東面向祝曰以歲之正以月之令咸加其服以成厥德萬壽無疆

承天之慶乃跪冠與賓復位賓之贊冠者跪受簪結
纓興復位賓揖皇太子贊冠者引皇太子適東序著
衮冕之服以出立於席東西面贊冠者徹纒櫛二箱
入於帷內主人贊冠者又設醴皇太子席於室戶西
南向下莞上藻賓之贊冠者於東席帷內盥手洗解
典膳郎酌醴加柶覆之面柶賓之贊冠者受面葉立於
序內南面立賓揖皇太子贊冠者引皇太子就筵西
南面立賓進受醴加柶面柶進皇太子筵前北面立
祝曰甘醴惟厚嘉薦令芳拜受祭之以定厥祥承天
之休壽考不忘皇太子筵西拜受解賓復位東面答
拜贊冠者興進饌陳於皇太子筵前皇太子升筵坐

左執觶右執脯擣於醢祭於籩豆之間贊冠者取籩
菹偏擣於豆以授皇太子又祭於籩豆之間贊冠者
取腍一以授皇太子皇太子奠觶於薦西興受腍卻左
手執本坐右手絕末以祭上左手齊之興以授贊冠者
贊冠者加於俎皇太子悅手興取解以柶祭禮三始扱
一祭又扱再祭加柶於觶面葉興筵末坐啐醴建柶興
降筵西南南面坐奠觶再拜執觶興賓答拜皇太子
升筵坐奠觶於薦東興降筵贊冠者引皇太子降自
西階立於西階之東南面賓初答拜訖降立於西階
之西近南東面引賓之贊冠者隨降立於賓西東南
面皇太子立定賓少進字之曰禮儀既備令月吉日

昭告厥宇君子攸宜宜之於嘏永寧保之奉勅字某
皇太子再拜曰某雖不敏敢不祗奉又再拜洗馬引
皇太子降初行樂作至阼階下位樂止三師在南北
面三少在北南面立定皇太子西面再拜三師等各
再拜以出於三師拜訖典儀曰再拜贊者承傳群官
在位者皆再拜左庶子前稱禮畢皇太子乘輿以入
侍臣從至閣如常儀初皇太子降通事舍人引賓贊
及宗正卿出就會所

會賓贊

賓既出於會所門外之西東面北上宗正卿立於門
東西面立定一揖一讓而入宗正卿立於座東西面

賓贊立於座西東面俱再拜就座俛伏坐遂行酒酒
至賓主俱興再拜就席坐飲食至賓主俱興再拜就
席坐食會訖賓贊立於西廂東面南上宗正卿立於
東廂西面執事奉束帛之篚以受宗正卿又執事者
奉束帛篚立於宗正之後後牽乘馬入陳於庭北首
西上賓贊俱廻北面西上再拜宗正卿以幣篚進西
南向授賓執事者以幣進授贊冠者宗正卿與執事
者退復位賓贊降從者互受幣賓當庭實揖左右馬
以出三馬從出從者互受馬宗正卿出門東西面賓
出門西東面北上宗正卿與賓俱揖而退賓贊就車
輅詣順天門外復命

朝謁

朝前衛尉先於順天門外東朝堂之北設太子次又於後設三師三少及詹事等次皇太子冠訖諸衛尉率依常行鹵簿陳列威儀仗衛前後部鼓吹備列師傅以下及宮臣皆服其服皇太子服遠遊冠絳紗袍乘輿以出儀衛侍從如常禮洗馬前導皇太子出重明門左庶子跪奏請降輿升輅又左庶子稱令曰諾左庶子俛伏興皇太子降輿升金輅三師乘輅車訓導在前三少乘輅車訓從在後威儀仗衛依鹵簿發引鳴鐃而行至長樂門鐃吹止至順天門次迴輅西向左庶子跪奏請降輅就次又左庶子稱令曰諾左庶

子俛伏興皇太子降輅洗馬前導入次左庶子侍右舍人引三師三少詹事就次皇太子俛伏於次少頃舍人奏聞典儀先於皇帝所御殿前設皇太子位左庶子跪奏請入又左庶子稱令曰諾庶子俛伏興皇太子出次左庶子等扶持舍人引洗馬前導引當門揖引入外官外入諸儀衛鹵簿等悉陳列於門外皇太子自東上閣洗馬左庶子等從入至皇帝所御殿前位北向立從官陪後左庶子贊拜皇太子再拜侍中宣勅戒曰事親以孝接下以仁使人以義養人以惠訖皇太子再拜少進稱臣雖不敏敢不祗奉又再拜訖引下詣皇后所御殿至殿院內給事奏聞出則皇太

子入洗馬左庶子等不入太子至皇后所御殿前北向立再拜尚儀前承令降詣皇太子西北東面稱令旨皇太子再拜宣令戒之詞如皇帝皇太子再拜少進稱臣夙夜祇奉不敢失墜又再拜司言引至閣舍人承引以出皇太子還如來儀

皇太子謁太廟

前一日皇太子宿齋於正殿其官臣從入廟者宿於家正寢所司拂除廟之内外衛尉設皇太子次於寢西南角東向又設三師以下及官官次於皇太子之後少近西俱東向又設宮官次於東宮官堂奉禮郎設皇太子版位於朝廷道東北向典儀設官臣位於

重明門外文官在東西面武官在西東面每等異位重行俱以北爲上其日未明所司依鹵簿陳設於重明門外官臣應從者依時刻集朝堂次皆服朝服非朝服者服公服諸衛率各勒所部陳設如式左庶子版奏請中嚴僕陳輅於西閣外南向車右執刀立於輅前北向舍人引官官各就位侍衛之官各服其器服其庶子負寶如式俱詣閣奉迎左庶子版奏外辨僕奮衣而升正立執轡皇太子服遠遊冠絳紗袍以出左右侍衛如常洗馬引皇太子升僕立授綬命車右升訖車驅左庶子以下夾侍如式出重明門左庶子進當輅前跪奏稱左庶子臣某言請車輅權停請

侍臣上馬俛伏興退稱侍臣上馬贊者唱侍臣上馬
文武侍臣皆上馬官官上馬畢左庶子進當輅前跪
奏稱左庶子臣某言請發引俛伏興退復位皇太子
車輅動鐃吹不作文官在左武官在右至下馬所侍
臣並下車馬皇太子至次所迴輅南向庶子跪奏稱
左庶子臣某言請殿下降輅俛伏興還侍位皇太子
降輅洗馬引入侍次臣立如常皇太子入次一刻頃
左庶子跪奏稱左庶子臣某言請殿下出次俛伏興
皇太子出次謁者引家令家令引皇太子入自南門
三師二少導從如式庶子二人一人贊左一人贊右
舍人二人從近伏量人從入皇太子至位立定家令

奏請殿下再拜皇太子再拜少頃家令奏事畢謁者
引家令家令引皇太子自出南門升輅還宮如來儀
至重明門外皇太子乘輅入將士停三師三少還皇
太子至殿前迴輅左庶子跪奏請殿下降輅俛伏興
皇太子降入侍臣從至閣左庶子跪奏請將士各還
本位其還宮鳴吹如常

會群臣

皇太子冠見廟之明日皇帝會群臣如元會之儀其
上壽詞云皇太子爰以吉辰載加元服德成禮備普
天同慶臣等不勝悅慶謹上千萬歲壽

群臣上禮

先上禮三日本司宣令諸應上禮文武之官一品以下五品以上前一日衛尉量設次於東朝堂漏水上七刻各集於次皆朝服奉禮郎先設上禮之官位於東朝堂南文東武西北面重行相對爲首又設中書舍人位於文官爲首者之北南向設奉禮郎位於文官東北替者二人在其南差退俱西向牛酒在文武二位之間少前舍人各引應上禮之官就位定令史二人對舉賀錄按禮部郎中引就中書舍人前取賀錄授舍人訖引校退奉禮郎唱再拜替者承傳在位者皆再拜中書舍人奉賀錄入進舍人引在位者退酒十二斛犢十二頭赤繩爲籠頭奏訖並付所司

皇太子會宮臣

皇太子會宮臣如常會之儀上壽與上同詞

宮臣上禮

先上禮一日詹事宣告上禮之官詹事以下七品以上晝漏上水七刻皆朝服集東宮南門之左典儀先設群官位於中門外北面以西爲上半酒置其位西五步少近晝漏上水八刻通事舍人引群官皆就位定詹事承奉群官簡錄案於詹事前東面跪授導客舍人導客舍人西面立受迴南向立典儀唱作可拜詹事以下俛伏興皆再拜導客舍人以簡錄按入通事舍人引群官以下左庶子省進酒九斛盛以銅鍾

一斛犢九頭赤繩爲籠頭皆付所司

社氏通典卷第一百二十六終

社氏通典卷第一百二十七

禮八十七

嘉六 纂類二十二
大書開元禮二十二

皇太子納妃臨軒命使 納采 問各 納吉

納徵 告期 告廟冊妃 臨軒醮戒

親迎 同牢 妃朝見 會群臣

皇太子納妃臨軒命使

將行納采制命使者吏部承以戒之前一日尚舍奉
御設御幄於太極殿北壁下南向衛尉設群官次於
東西朝堂太樂令展宮懸並如常儀其日典儀設文
武一品以下五品以上位於橫街之北西面北上朝
集使五品以上合班六品以下位於橫街南朝集使